

明史紀事本末詳

明史紀事本末評

明史紀事本末詳節卷三

豐潤谷應泰原輯

閩縣林紓重編

開設貴州

太祖洪武十五年春正月置貴州都指揮使司命平涼侯費聚汝南侯梅思祖署司事貴州古羅施鬼國自蜀漢夷有火濟者從諸葛亮南征孟獲有功封羅甸國王歷唐宋皆以歸順不失爵土至是遣傅友德等平雲南靄翠者故元宣慰使也見雲南俱平乃與同知宋欽皆降上仍授靄翠宣慰使欽宣慰同知各領所部居水西爲貴州宣慰使隸四川其思州宣慰使田仁智

思南宣慰使田茂安、暨鎮遠等府隸湖廣、普安鎮寧等州隸雲南、成祖永樂十一年二月、設貴州等處承宣布政使司、及思州新化黎平石阡思南鎮遠銅仁烏羅八府、以工部侍郎蔣廷瓚爲左布政使、初洪武中止設貴州思南州諸宣慰使、思州所轄二十二長官司、思南所轄十七長官司、仍設都指揮使司、鎮守其地、及靄翠死、妻奢香代立、宋欽死、妻劉氏代立、劉氏多智術、時馬燧以都督鎮守其地、政尙威嚴、欲盡滅諸羅、代以流官、乃以事裸撻奢香、欲激怒諸羅爲兵端、諸羅果憤怒欲反、劉氏聞止之、爲走愬京師、上召問、令入宮見高皇后、復令拆簡招奢香至、詢故、上曰、汝誠苦馬都督、吾爲汝除之、然何以報我、奢香叩

頭曰願世世戢諸羅令不敢爲亂上曰此汝常職何云報也奢
香曰貴州東北有間道可通四川梗塞未治願刊山通道以給
驛使往來上許之謂高皇后曰吾知馬燧忠無他腸然何惜一
人不以安一方也乃召燧數其罪斬之遣奢香等歸諸羅大感
服爲除赤水烏撒道立龍場九驛達蜀後安氏即靄翠後也至
永樂初思州宣慰使田仁智子琛思南宣慰使田茂安子宗鼎
各嗣立以爭沙坑故日尋兵上討平之命戶部尙書夏原吉等
曰思州思南苦田氏久矣不可令遺孽復踵爲亂其易爲府治
改思州宣慰司爲思州府思南宣慰司爲思南府

設立三衛

成祖永樂元年三月改北平行都司爲大寧都司徙保定以大寧故地界三衛大寧故兀良哈地也在烏龍江南漁陽塞北春秋時爲山戎秦時爲遼西北境漢爲奚所據後魏韓庫莫奚服屬契丹唐爲奚契丹元爲大寧路洪武中元兵遁沙漠屢侵之乞降高皇帝割錦義建利諸州隸遼東而於古會州大寧地北設北平行都司領興營等二十餘衛所十四年封皇子權於大寧爲寧王時宋國公馮勝征納哈出據大寧塞列戍控制遂築大寧寬河會州富峪四城卒破降納哈出二十二年封兀良哈爲三衛處降人而以阿扎失里等爲三衛指揮使同知自大寧

前抵喜峰、近宣府曰朶顏、自錦義歷廣寧、渡遼河至白雲山爲泰寧、自黃泥窪逾瀋陽鐵嶺至開原曰福餘、惟朶顏最強、其貢路入自喜峰口、而市則在遼東、防其變也、後竟叛去、附於元、燕王起兵從劉家口徑趨大寧、不數日奄至、寧王猝出不意降、燕王乃移王與其軍內地、盡拔降騎還北平、從戰有功、遂以三衛地畀兀良哈、使仍爲三衛、其官都督至指揮千百戶有差、約以爲外藩、居則偵探警則捍衛、歲給牛具種布帛酒食良厚、此棄大寧設三衛之始也、三衛自遼瀋抵宣府幾三千里、大寧旣棄、天壽山與異域爲鄰、而宣府遼東斷左右臂、乃調營州左屯衛於順義、右屯衛於薊州、中屯衛於平谷、前屯衛於香河、後屯衛

於三河、衛設左右中前後五所，仍隸大寧都司。復設東勝中前後三所千戶，於懷仁等處守備。然諸部落已列我門庭矣。亡何三衛復叛，附阿魯台。終明之世，泰寧、福餘常與東合，而朵顏常與西合，爲中國膏肓之患，則皆三衛爲之鄉導也。正統九年秋七月，兀良哈入寇，命成國公朱勇等率諸軍二十萬分道出塞擊之，破福餘於全寧，復破泰寧。朵顏於虎頭山出所掠萬計，而都督楊洪出黑山，俘斬安出部，各論功加秩。三衛從是寢衰，然怨中國益刺骨，因糾也先入寇，爲之鄉導矣。十四年三月，福餘、泰寧共潛結也先入寇，朵顏獨拒險不從，也先至不能入，大掠二衛人畜去。其秋旋與也先合，土木北狩，命都御史鄒來學經

略京東并設參將總兵罷朶顏三衛互市穆宗隆慶二年夏四月以侍郎譚綸爲總督拜戚繼光大將軍專理練兵綸繼光浚隍增埤邊備甚設而時俺答亦奉款迄隆慶三衛修職謹邊鄙稍息萬歷四十六年夏四月滿旦及男溫布台吉等睥睨石塘間而馬蘭亦報蟒金聲犯桃林界嶺薊鎮戒嚴未幾石塘遊擊朱萬良調援遼滿旦母子益恣以萬騎攻白馬關及高家堡頃之尋盟蓋自隆慶來長昂稱梟桀雄塞上垂四十年而土蠻部落如虎墩炒花宰賽煖兔輩東西揚動邊吏疲於奔命至滿旦以一婦人躑躅曹石間竟不可制然亦自此漸微弱不能自立矣

親征漠北

永樂八年春正月，以皇長孫留守北京，命夏原吉兼掌行在六部及都察院事，輔之。丁未，車駕發北京，親征本雅失里。三月，出塞，次凌霄峰，登絕頂，望漠北，萬里蕭條。顧胡廣等曰：「元盛時，此皆民居也。」四月，次長清，塞地極北，夜望北斗，已在南矣。師次濶灤海，其水周圍千餘里，幹難臚胸。凡七河，水注其中。戊寅，至兀古兒札河。本雅失里先遁，夜倍道追。己卯，至幹難河。元太祖始興之地也。本雅失里率衆拒戰，上麾前鋒迎擊，一鼓敗之。本雅失里棄輜重，以七騎渡河遁去。六月，班師，至飛雲壑。阿魯台復來戰，上率精騎衝陣，大呼奮擊。阿魯台墮馬，復上。六師乘之，追

奔百餘里，斬其名王以下百數十人。阿魯台攜家屬遠遁，師次擒狐山，上令勒銘曰：瀚海爲鑕，天山爲鐸，一掃風塵，永清沙漠。次清流泉，又勒銘曰：於鑠六師，禁暴止侮，山高水清，永彰我武。七月車駕還，至北京。十二年春二月，詔親征瓦剌。三月車駕發北京，皇太孫從。上謂侍臣曰：朕長孫聰明英睿，勇智過人。今肅清沙漠，使躬歷行陣，見將士勞苦，征伐不易，又謂胡廣、楊榮、金幼孜曰：每日營中閒暇，爾等即以經史於長孫前講說，文事武備，不可偏廢。夏四月，駐蹕興和，大閱五軍，盡出塞。五月，師次楊林城，上閱武之暇，皇太孫侍，恒語以創業守成之難。六月三日甲辰，師至撒里怯兒之地，前鋒劉江遇敵三峽口，擊走之。上度

其必大至，嚴陣以待。乙巳，獲諜，知瑪哈木距此百里，兼程赴之。戊申，發蒼厓峽，次蘭忽失溫答里巴。瑪哈木太平孛羅埽境，以三萬人來戰。頓山嶺，敢發，上遣鐵騎挑之，敵奮而下。安遠侯柳升以神機礮斃其騎數百，上率鐵騎乘之，遂敗卻。武安侯鄭亨追擊，中流矢退。寧侯陳懋、成山侯王通率兵薄其右掖，不動。豐城侯李彬都督譚清攻其左，敵殊死戰。都指揮滿都死，上遙見，率鐵騎馳擊，呼聲動天地。瑪哈木不能支，大軍乘之，遂大潰走，追至土刺河，生擒數十人。瑪哈木乘夜北遁，時瓦剌雖大創去，然殺傷亦略相當。夜二鼓，上還帳中，遂下令班師。八月上還北京。十九年冬十月，阿魯台叛，數寇邊，上遂議親征。十二月上命

大臣集議戶部尙書夏原吉等共議宜且休養兵民嚴飭邊將備禦未奏會上召兵部尙書方賓賓言今糧儲不足未可興師遂召原吉問邊儲多寡對曰僅給將士備禦之用不足以給大軍且言頻年師出無功戎馬資儲十喪八九災眚閒作內外俱疲況聖躬少安尙須調護勿煩六師上不懌令原吉往視開平糧儲既而刑部尙書吳中入對與方賓同上益怒賓懼自縊命錦衣官取原吉還至則啓厥理儲錦衣促之原吉曰姑俟畢此不然恐有侵盜死吾安之不以累公及至上問親征得失具對如初上令同中繫於掖庭獄時禮部尙書呂震數乘間言賓與中原吉皆儉邪誣罔上信之命戮賓尸將殺原吉召楊榮問原

吉平昔所爲，榮力言其無他，怒稍釋，置不問。二十年春三月，丁丑，親征阿魯台。戊寅，車駕發北京。辛巳，師次鷄鳴山。阿魯台聞上親征，遂夜遁。四月辛丑，師次龍門。五月辛酉，師次獨石。端午，賜隨征文武羣臣宴。乙丑，師度偏嶺，命將士獵於道旁山下。丁卯，大閱諸將。戊辰，觀士卒射。有一卒三發皆中，賜牛羊錢鈔。上親製平戎曲，俾將士歌之。辛未，師發隰寧。西涼亭，西涼亭者，故元往來巡遊之所。上望其頽垣遺址，樹木鬱然，謂侍臣曰：「元氏創此，將遺子孫爲不朽之圖，豈計有今日？」書云：「常厥德，保厥位，厥德靡常，九有以亡。」况一亭乎？因下令禁軍士斬伐樹木。癸酉，次閔安。下令軍中樵牧不得出長圍外。癸未，師發威鹵鎮。次行

州命戶部以山西河南山東所運糧六萬餘石儲於山海六月
癸巳師次威遠川開平來報阿魯台進攻萬全諸將請分兵還
擊之上曰此詐也彼方慮吾搗巢故爲牽制之術疾驅之果遁
去七月己未師次殺胡原阿魯台盡棄其馬駝牛羊輜重於潤
灤海與其家屬北走乃召都督朱榮吳成等還發兵盡收所棄
牛羊駝馬焚其輜重命旋師簡精兵還擊兀良哈大破之八月
以班師遣書諭皇太子頒詔天下九月上入居庸關次龍虎臺
饗隨征將校京師文武大臣迎見上乘法駕入京城十二月阿
魯台弑其主本雅失里自稱可汗二十一年秋七月諜報阿魯
台將犯邊上曰去秋親征彼意吾不能復出當亟馳塞外待之

八月壬子、宴大營五軍諸將、因大閱、癸丑發京師、命大學士楊榮掌軍中機務、丙寅發宣府、次沙嶺、賜諸將內廐馬、戊辰次萬全、九月師次沙城、知院阿失帖木兒、古納台等、率其妻子來降、冬十月師次上莊堡、韃靼王子也先土干率妻子部屬來歸、封爲忠勇王、賜姓名金忠、遣書諭皇太子以也先土干納款之故、遂下詔班師、二十二年春正月、阿魯台寇大同、夏四月戊申、詔命皇太子監國、發京師、大學士楊榮金幼孜從、五月己卯次開平、遣中官伯力哥齎勅往諭阿魯台部落、虜遁、甲子召張輔等諭旋師、秋七月庚辰、命大學士楊榮金幼孜刻石紀功、曰使萬世後知朕親征過此也、己丑次蒼崖、上不豫、下令大營五軍將